



Godina XXV - Broj 6

ZENICA, ponedjeljak, 06.04.2020.god.

V L A D A**141.**

Na osnovu člana 16. stav 1. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10), člana 20a. stav (4) Zakona o radu („Službene novine Federacije BiH“, broj: 26/16 i 89/18) i Odluke o proglašenju stanja nesreće uzrokovno pojavom koronavirusa (COVID 19) na području Federaciji Bosne i Hercegovine, broj: 408/2020 od 16.03.2020. godine, Vlada Zeničko-dobojskog kantona, na 49. sjednici, održanoj dana 24.03.2020. godine, d o n o s i

U R E D B A

**O DOPUNI UREDBE O POSTUPKU PRIJEMA U
RADNI ODNOS U JAVNOM SEKTORU
U ZENIČKO-DOBOJSKOM KANTONU**

Član 1.**(Dopuna člana 7.)**

U Uredbi o postupku prijema u radni odnos u javnom sektoru u Zeničko-dobojskom kantonu („Službene novine Zeničko-dobojskoga kantona“, broj: 8/19), u članu 7. stav (1) iza tačke b) dodaje se tačka c) koja glasi:“ prijema u radni odnos u zdravstvenim ustanovama na području Zeničko-dobojskog kantona, i to: JU Kantonalna bolnica Zenica, JU Opća bolnica Tešanj, Zavod zdravstvenog osiguranja Zeničko-dobojskog kantona, JU Institut za zdravlje i sigurnost hrane Zenica, JU Zavod za medicinu rada i sportsku medicinu Zeničko-dobojskog kantona, JU Zavod za bolesti ovisnosti Zeničko-dobojskog kantona, JU poliklinika sa dnevnim bolnicom Doboj Jug i svim domovima zdravlja na području Zeničko-dobojskog kantona, za vrijeme dok je na snazi Odluka o proglašenju nesreće stanja nesreće uzrokovno pojavom koronavirusa (COVID 19) na području Federaciji Bosne i Hercegovine“.

Član 2.**(Stupanje na snagu)**

Ova uredba stupa na snagu danom donošenja i bit će objavljena u “Službenim novinama Zeničko-dobojskog kantona”.

Broj: 02-02-4692/20

Datum: 24.03.2020. godine

Zenica

P R E M I J E R**Mirza Ganić, s.r.****142.**

Na osnovu člana 16. stav 1. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10) a u vezi sa članom 20. Zakona o pravima demobiliziranih branilaca i članova njihovih porodica („Službene novine Federacije Bosne i Hercegovine“, broj: 54/19), na prijedlog Ministarstva za boračka pitanja, Vlada Zeničko-dobojskog kantona, na 8. vanrednoj sjednici održanoj dana 31.03.2020. godine d o n o s i

U R E D B U

**O NOVČANOJ EGZISTENCIJALNOJ NAKNADI
ZA DEMOBILIZIRANE BRANIOCE**

DIO PRVI - OPĆE ODREDBE**Član 1.****(Predmet Uredbe)**

Ovom uredbom utvrđuju se uvjeti, način i postupak ostvarivanja prava na novčanu egzistencijalnu naknadu za demobilizirane branioce koji imaju prebivalište na području Zeničko-dobojskog kantona (u daljnjem tekstu:

Kanton), kao i povratnike u Republiku Srpsku koji ostvaruju osnovna prava iz branilačko-invalidske zaštite u gradu/općinama Kantona i koji su na evidenciji nadležnog organa za vojne evidencije u gradu/općinama Kantona.

Član 2.

(Korisnici prava)

- (1) Pravo na dodjelu novčane egzistencijalne naknade po ovoj Uredbi može ostvariti demobilizirani branilac koji:
 - a) nema navršenu dob od 57 godina života;
 - b) ima prebivalište na području Kantona u trajanju od najmanje dvije godine u kontinuitetu, osim povratnika u Republiku Srpsku;
 - c) je u periodu od 06.04.1992. do 23.12.1995.godine u sastavu Oružanih snaga proveo najmanje 24 mjeseca, odnosno 12 mjeseci ukoliko je u Oružane snage pristupio kao maloljetno lice ili šest mjeseci po punoljetstvu;
 - d) je kao nezaposleno lice na evidenciji nadležne službe za zapošljavanje u periodu od najmanje 12 mjeseci prije podnošenja zahtjeva za ostvarivanje prava; ili ima utvrđenu nesposobnost za rad i privređivanje; ili je korisnik penzije u iznosu od 50% minimalne penzije isplaćene u Federaciji Bosne i Hercegovine za decembar 2019.godine (185,88 KM) ili nižem;
 - e) ima utvrđena ukupna primanja zajedničkog domaćinstva koja ne prelaze iznos prosječne neto plaće isplaćene u Kantonu za 2019. godinu.
- (2) U period proveden na evidenciji nezaposlenog lica iz odredbe stava 1) tačka d) ovog člana, nezaposlenom demobiliziranom braniocu, povratniku u Republiku Srpsku, koji je po osnovu Zakona o izmjenama i dopunama Zakona o posredovanju u zapošljavanju i pravima za vrijeme nezaposlenosti („Službeni glasnik Republike Srpske“, broj: 94/19) 01.01.2020. godine, brisan sa evidencije nadležne službe za zapošljavanje Republike Srpske, te koji se u roku od jednog mjeseca ponovno prijavio nadležnom birou za nezaposlena lica, bit će uračunat i period između brisanja i ponovnog prijavljivanja na evidenciju.
- (3) Prihodom zajedničkog domaćinstva, u smislu odredbe stava (1) tačka e) ovog člana, ne smatraju se: novčana egzistencijalna naknada ostvarena po Federalnom zakonu ili ovoj Uredbi, novčane naknade po osnovu prava lica sa invaliditetom, dodatak na djecu, stipendije, krediti učenika i studenata, alimentacija i jednokratne pomoći.

(4) Odredba stava 1) tačka e) ovog člana ne primjenjuje se u slučaju ukoliko supružnik podnosioca zahtjeva za novčanu egzistencijalnu naknadu također ima status demobiliziranog branioca iz stava 1. tačka c) ovog člana.

(5) Zahtjev za novčanu egzistencijalnu naknadu koji je podnio demobilizirani branilac koji ima status ratnog vojnog invalida utvrđen u skladu sa odredbama Zakona o pravima branilaca i članova njihovih porodica („Službene novine Federacije Bosne i Hercegovine“, broj: 33/04, 56/05, 70/07, 9/10 i 90/17), a koji ima period učešća u Oružanim snagama kraći od perioda utvrđenog stavom (1) tačka c) ovog člana, bit će uzet u razmatranje kao zahtjev demobiliziranog branioca koji ima period učešća u Oružanim snagama od 24 mjeseca.

Član 3.

(Pojmovi korišteni u Uredbi)

- (1) Novčana egzistencijalna naknada u smislu ove Uredbe je mjesečna novčana naknada koju Ministarstvo za boračka pitanja Zeničko-dobojskog kantona (u daljnjem tekstu: Ministarstvo) na osnovu usvojenog programa utroška sredstava budžeta Kantona planiranih na razdjelu Ministarstva za tekuću budžetsku godinu, odobrava i isplaćuje demobiliziranim braniocima koji nemaju navršenih 57 godina života, a u svrhu poboljšanja njihovog materijalnog položaja, odnosno socijalno-ekonomske situacije u kojoj se nalaze.
- (2) Definicija pojma "demobilizirani branilac" koji se koristi u Uredbi, utvrđena je odredbom člana 2. Zakona o pravima demobiliziranih branilaca i članova njihovih porodica („Službene novine Federacije Bosne i Hercegovine“, broj: 54/19, u daljnjem tekstu: Federalni zakon).
- (3) Zajedničko domaćinstvo u smislu ove Uredbe je ekonomska zajednica jedne ili više porodica u kojoj zajednički stiču i troše novčana i druga materijalna sredstva stečena radom.

Član 4.

(Visina naknade)

(1) Iznos novčane egzistencijalne naknade utvrđuje se množenjem osnovice u iznosu od 4 KM po mjesecu provedenom u Oružanim snagama i koeficijenta za obračun utvrđenog instrukcijom koju donosi Ministarstvo.

- (2) Koeficijent za obračun se utvrđuje mjesečno, u zavisnosti od broja korisnika i opredjeljenih budžetskih sredstava Ministarstva za ovu svrhu.
- (3) U slučaju da period koji je demobilizirani branilac proveo u Oružanim snagama pored broja mjeseci sadrži i više od 10 dana ratnog staža, onda se i taj period računa kao puni mjesec (npr. 25 mjeseci i 11 dana = 26 mjeseci), ukoliko demobilizirani branilac ispunjava uvjet iz člana 2. stav (1) tačka c) Uredbe.

Član 5.

(Dokazivanje statusa)

U postupku ostvarivanja prava na novčanu egzistencijalnu naknadu, demobilizirani branilac svoj status dokazuje uvjerenjem o periodu učešća u Oružanim snagama izdatim od strane nadležnog federalnog organa za pitanja evidencija iz oblasti vojne obaveze (uvjerenje VFMB-3a).

DIO DRUGI - OSTVARIVANJE PRAVA

Član 6.

(Podnošenje zahtjeva)

Zahtjev za ostvarivanje prava na novčanu egzistencijalnu naknadu (u daljnjem tekstu: zahtjev) demobilizirani branilac podnosi gradskoj/općinskoj službi nadležnoj za poslove branilačko-invalidske zaštite u gradu/općini u kojoj podnosioc zahtjeva ima prebivalište, odnosno u kojoj ostvaruje prava iz branilačko-invalidske zaštite ili u kojoj se nalazi na evidenciji nadležnog organa za vojne poslove (u daljnjem tekstu: gradska/općinska služba).

Član 7.

(Obrazac zahtjeva)

Zahtjev se podnosi na posebnom obrascu kojeg propisuje ministar Ministarstva, u roku od osam dana od dana stupanja na snagu Uredbe.

Član 8.

(Potrebna dokumentacija)

- (1) Uz zahtjev demobilizirani branilac prilaže slijedeću dokumentaciju:
- fotokopija lične karte,
 - uvjerenje MUP-a o kretanju (kao dokaz o prebivalištu),
 - uvjerenje da je bio pripadnik Oružanih snaga,
 - uvjerenje nadležne službe za zapošljavanje da se nalazi na evidenciji nezaposlenih osoba najmanje

12 mjeseci prije podnošenja zahtjeva (povratnici u RS prilažu uvjerenje o ispunjavanju uvjeta iz člana 2. stav (2) Uredbe) i da ne prima novčanu naknadu za vrijeme nezaposlenosti ili rješenje nadležnog organa o utvrđenoj nesposobnosti za rad i privređivanje, ili rješenje o penziji (domaćoj i inozemnoj),

- izjava o članovima zajedničkog domaćinstva,
 - uvjerenje o bračnom stanju,
 - uvjerenje o prihodima zaposlenih, odnosno dokaz o nezaposlenosti punoljetnih članova domaćinstva,
 - potvrda banke sa brojem tekućeg računa podnosioca zahtjeva ili kopija tekućeg računa podnosioca zahtjeva.
- (2) Priložena dokumentacija treba biti original ili ovjerena kopija ne starija od šest mjeseci.

Član 9.

(Od kada se pravo priznaje)

Demobiliziranim braniocima koji ispunjavaju uvjete za priznavanje prava, novčana egzistencijalna naknada pripada od prvog dana narednog mjeseca od dana podnošenja zahtjeva.

Član 10.

(Rješavanje o pravima u prvostepenom postupku)

- Gradska/općinska služba donosi rješenje kojim odobrava ili odbija zahtjev za priznavanjem prava na novčanu egzistencijalnu naknadu i isto dostavlja podnosiocu zahtjeva.
- Gradska/općinska služba je dužna u roku od tri dana po pravosnažnosti rješenja kojim se odobrava zahtjev podnosioca, isto u tri primjerka i zajedno sa kompletnim spisom predmeta dostaviti Ministarstvu radi provođenja postupka revizije.
- Rješenje kojim se zahtjev podnosioca odbija i rješenje protiv kojeg je izjavljena žalba, ne podliježu reviziji.
- Žalba na prvostepeno rješenje podnosi se gradskoj/općinskoj službi u roku od osam dana od dana prijema rješenja.
- Rješenje na koje je izjavljena žalba, sa kompletnim spisom predmeta, gradska/općinska služba dostavlja Ministarstvu u roku od tri dana.
- Revizija i žalba odlažu izvršenje rješenja.

Član 11.

(Revizija)

- (1) U postupku revizije, Ministarstvo može dati saglasnost na prvostepeno rješenje, ukoliko ocijeni da je isto zakonito i pravilno doneseno, ili može poništiti i vratiti na ponovno rješavanje prvostepenom organu ili samo drugačije riješiti upravnu stvar, ukoliko ocijeni da rješenje sadrži formalno-pravne nedostatke.
- (2) Protiv rješenja o poništavanju i vraćanju na ponovni postupak ne može se pokrenuti upravni spor.

Član 12.

(Postupak po žalbi)

- (1) Po žalbi izjavljenoj na prvostepeno rješenje rješava Ministarstvo.
- (2) Ukoliko u postupku po žalbi Ministarstvo odluči u meritumu o konkretnoj upravnoj stvari, smatra se da je tim rješenjem proveden postupak revizije.
- (3) Protiv rješenja donesenog po žalbi može se pokrenuti upravni spor.

Član 13.

(Način isplate)

Način i postupak isplate odobrenih sredstava novčane egzistencijalne naknade utvrđuje se instrukcijom iz člana 4. stav (1) Uredbe.

Član 14.

(Kontinuitet isplate)

- (1) Demobilizirani branilac koji je korisnik prava na novčanu egzistencijalnu naknadu, obavezan je u periodu od 01.12. do 31.12. tekuće budžetske godine gradskoj/općinskoj službi dostaviti ažuriranu dokumentaciju iz člana 8. stav (1) ove uredbe, a u svrhu nastavka isplate naknade u narednoj budžetskoj godini.
- (2) U slučaju da korisnik prava ne dostavi dokumentaciju u roku iz stava (1) ovog člana, gradska/općinska služba će donijeti zaključak o obustavi isplate naknade, primjerak kojeg je obavezna dostaviti i Ministarstvu.

Član 15.

(Prestanak prava)

- (1) Pravo na novčanu egzistencijalnu naknadu korisniku prava prestaje:
 - a) usljed smrtnog slučaja;
 - b) ispunjenjem dobi od 57 godina života;
 - c) zasnivanjem radnog odnosa;

d) promjenom prebivališta (izvan Kantona);

e) ostvarivanjem prava na penziju u iznosu višem od 185,88 KM;

f) ostvarivanjem ukupnih prihoda u zajedničkom domaćinstvu u iznosu iznad prosječne neto plaće isplaćene u Kantonu za 2019. godinu.

(2) Korisnik prava, odnosno član zajedničkog domaćinstva umrlog korisnika prava, dužan je u roku od 15 dana od dana nastanka promjene prijaviti prvostepenom organu svaku promjenu koja utiče na prestanak prava.

(3) Pravo na novčanu egzistencijalnu naknadu ne može se prenijeti na drugo lice.

(4) Prvostepeni organ će po službenoj dužnosti, na osnovu dostavljene prijave ili saznanja na drugi način o osnovu za prestanak prava, donijeti rješenje o prestanku prava i isto dostaviti korisniku prava, odnosno članu zajedničkog domaćinstva i Ministarstvu.

(5) Rješenje o prestanku prava ne podliježe reviziji.

(6) Za mjesec u kojem je nastupio osnov za prestanak prava, bit će izvršen obračun i isplata novčane egzistencijalne naknade.

Član 16.

(Povrat sredstava)

(1) Korisnik kome je isplaćena naknada po ovoj uredbi na koju nije imao pravo, dužan je vratiti primljeni iznos, odnosno isti doznačiti na račun budžeta Kantona.

(2) Za nepravilne isplate koje su nastale kao greška organa koji je vodio postupak, nepravilno isplaćena sredstva nadoknadit će organ koji je učinio grešku i odgovarajući iznos doznačiti na račun budžeta Kantona.

Član 17.

(Troškovi postupka)

(1) Troškove postupka u vezi sa ostvarivanjem prava prema ovoj uredbi, snosi organ koji vodi postupak.

(2) U postupku za ostvarivanje prava po Uredbi ne plaća se taksa.

(3) Na novčana primanja prema Uredbi ne plaćaju se porezi i doprinosi.

Član 18.

(Osiguravanje sredstava za provođenje Uredbe)

- (1) Sredstva za novčanu egzistencijalnu naknadu se osiguravaju u budžetu Kantona, na budžetskoj stavci Ministarstva.
- (2) Ministarstvo vodi evidenciju o izvršenim isplatama i o tome godišnje izvještava Vladu Kantona.

Član 19.

(Evidencija)

Elektronsku evidenciju o podnesenim zahtjevima i korisnicima prava po ovoj uredbi vode gradska/općinska služba i Ministarstvo, po posebnim obrascima koje propisuje ministar Ministarstva u roku od osam dana od dana stupanja Uredbe na snagu.

DIO TREĆI - PRIJELAZNE I ZAVRŠNE ODREDBE

Član 20.

(Primjena odredbi Zakona o upravnom postupku)

U postupku za ostvarivanje prava po ovoj uredbi primjenjuju se odredbe Zakona o upravnom postupku („Službene novine Federacije Bosne i Hercegovine“, broj: 2/98 i 48/99), ukoliko Uredbom ili propisom donesenim na osnovu Uredbe nije drugačije propisano.

Član 21.

(Nadzor)

- (1) Nadzor nad provođenjem ove uredbe i propisa donesenih na osnovu nje, te neposredan upravni i finansijski nadzor i kontrolu namjenskog trošenja sredstava namijenjenih za ostvarivanje prava po Uredbi, vrši Ministarstvo.
- (2) U izvršavanju svojih obaveza iz stava (1) ovog člana, Ministarstvo kao kontrolor u smislu odredbi Zakona o zaštiti ličnih podataka („Službeni glasnik Bosne i Hercegovine“, broj: 49/06, 76/11 i 89/11) vrši obradu ličnih podataka neophodnih za utvrđivanje identiteta podnosioca zahtjeva za korištenje prava po Uredbi, uključivo jedinstveni matični broj građana.

Član 22.

(Ravnopravnost spolova)

Sve imenice koje se odnose na demobilizirane branioce upotrebene u ovoj uredbi samo u muškom rodu, odnose se na oba spola.

Član 23.

(Stupanje na snagu Uredbe)

Ova uredba stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 02-11-5112/20

Datum: 31.03.2020. godine

Zenica

P R E M I J E R

Mirza Ganić, s.r.

143.

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10), člana 16. stav (2) Zakona o izvršavanju Budžeta Zeničko-dobojskog kantona za 2020. godinu („Službene novine Zeničko-dobojskog kantona“, broj: 24/19) i člana 3. Odluke o kriterijima raspodjele finansijskih sredstava iz “Tekuće rezerve” Budžeta Zeničko-dobojskog kantona („Službene novine Zeničko-dobojskog kantona“, broj: 5/11), na prijedlog Ministarstva finansija, Vlada Zeničko-dobojskog kantona, na 48. sjednici, održanoj dana 13.03.2020. godine, d o n o s i

O D L U K U

o odobravanju korištenja sredstava “Tekuće rezerve” Budžeta Zeničko-dobojskog kantona za 2020. godinu

Član 1.

(Odobranje korištenja sredstava “Tekuće rezerve”)

Odobrava se korištenje sredstva Tekuće rezerve iz Budžeta Zeničko-dobojskog kantona za 2020. godinu („Službene novine Zeničko-dobojskog kantona“, broj: 24/19), u iznosu od 50.000,00 KM za namjene utvrđene u Zahtjevu Ministarstva zdravstva Zeničko-dobojskog kantona, broj: 11-33-1335-18-1/20 od 09.03.2020. godine za nabavku zaštitne opreme i dezinfekcionih sredstava za potrebe zdravstvenih ustanova, koja je neophodno nabaviti u slučaju pojave većeg broja slučajeva sumnjivih na corona virus, zbog vanrednih okolnosti pojave corona virusa u Bosni i Hercegovini.

Član 2.

(Realizacija Odluke)

Za realizaciju ove odluke zadužuju se Ministarstvo finansija i Ministarstvo zdravstva, svako u okviru svojih nadležnosti.